



ACORDO DE COLABORACIÓN ENTRE A AXENCIA GALEGA DE EMERXENCIAS E O CONCELLO DE PONTECESO PARA A CESIÓN EN PROPIEDADE DE EQUIPAMENTO DE EMERXENCIAS COFINANCIADO NUN 80% POLO FONDO FEDER NO MARCO DO PROGRAMA OPERATIVO FEDER GALICIA 2014-2020, O.T. 5, PRIORIDADE DE INVERSIÓN 5.2, OBXECTIVO ESPECÍFICO 5.2.1., LIÑA DE ACTUACIÓN 5.2.1.3.

Na Estrada (Pontevedra), 23 de agosto de 2019

REUNIDOS

Dunha parte, Marcos Araujo Pereira, xerente da Axencia Galega de Emerxencias (en diante, AXEGA), habilitado para a formalización deste acordo en virtude da Resolución de 20 de febreiro de 2019 de delegación de sinatura da Presidencia da AXEGA.

Pola outra parte, Xosé Lois García Carballido, alcalde do Concello de Ponteceso (A Coruña), actuando en virtude das facultades representativas que lle atribúe o artigo 21.1.b) da Lei 7/1985, do 2 de abril, reguladora das bases de réxime local, e o artigo 61.1.a) da Lei 5/1997, do 22 de xullo, de Administración Local de Galicia.

Ambas as partes recoñécense mutuamente, na calidade en que interveñen, capacidade legal suficiente, lexitimación e representación para o outorgamento deste acordo e para este efecto,

EXPOÑEN

PRIMEIRO. O programa operativo FEDER Galicia 2014-2020 ten entre os seus eixes reitores a dotación de equipamento, instalación e infraestruturas de protección civil destinadas á prevención e xestión de riscos derivados de catástrofes naturais e fenómenos relacionados co clima, co fin de garantir unha resposta eficaz fronte aos riscos producidos polos fenómenos da natureza así como os derivados da actividade do home sen esquecer as tarefas de prevención fronte aos mesmos.

SEGUNDO. Segundo o artigo 10 da Lei 5/2007, de 7 de maio, de Emerxencias de Galicia, o papel da Xunta de Galicia céntrase en tres funcións fundamentais: a superior coordinación e dirección da protección civil, a xestión dos servizos que se considere necesario prestar de forma unitaria para todo o territorio galego e a xestión das emerxencias que superen os medios de resposta de que dispoñen as entidades locais.



Para o desenvolvemento destas funcións ten unha importancia esencial a Axencia Galega de Emerxencias que se crea como entidade pública dotada de personalidade xurídica propia e plena capacidade para o cumprimento dos seus fins segundo o disposto no artigo 16 da Lei 5/2007, do 7 de maio, de Emerxencias de Galicia, á cal se lle encomenda a execución da política autonómica de protección civil e xestión de emerxencias e a xestión dos seus medios e servizos.

A AXEGA asume como propios os obxectivos en materia de protección civil e emerxencias que se especifican no artigo 3 do citado corpo legal, tanto da xestión dos riscos, da xestión das emerxencias como da xestión da rehabilitación mediante a restauración dos servizos esenciais e a recuperación da situación de normalidade tras a emerxencia.

A AXEGA ten entre as súas finalidades a de acadar unha elevada calidade de resposta ás emerxencias en todo o territorio de Galicia baseada en criterios de homoxeneidade, eficacia e eficiencia sendo unha das premisas establecidas nos plans de emerxencias a de asegurar a coordinación de todos os organismos e administracións implicadas, así como a de poñer a disposición dos servizos de intervención materiais e equipos específicos para o seu uso na resolución de determinado tipo de intervencións.

No marco do sistema público integrado de protección civil que define a Lei de Emerxencias de Galicia, a AXEGA exerce as súas funcións en colaboración con outras Administracións competentes na materia. Pero non sempre os servizos municipais ou supramunicipais dispoñen dos medios necesarios e dos recursos máis técnicos e especializados, polo que un dos obxectivos da AXEGA é poder dotalos dun equipamento axeitado que posibilite e redunde nunha mellor capacidade de intervención co fin de acadar un maior grao de seguridade para a cidadanía.

TERCEIRO.- Segundo dispoñen os artigos 25 e 26.1 da Lei 7/1985, de 2 de abril, reguladora das bases do réxime local e os artigos 80 e 81 da Lei 5/1997, de 22 de xullo, de Administración Local de Galicia, os municipios deberán prestar á súa cidadanía os servizos públicos que contribúan a satisfacer as necesidades e aspiracións da comunidade de veciños, entre os que se atopan a seguridade en lugares públicos e a protección civil e extinción de incendios, polo que teñen necesidade de contar con medios para poder facer fronte as súas competencias-en materia de protección civil e emerxencias.

CUARTO.- Con base no catálogo de medios e recursos e valorado o risco e as incidencias rexistradas, vistas as necesidades dos diversos intervinientes fronte as emerxencias e a dotación con que contan os distintos servizos, conclúese que o concello de Ponteceso (A Coruña), onde radica a localización estratéxica e sede do Grupo de Emerxencias Supramunicipal (GES en diante) de Ponteceso como grupo





operativo de emerxencias de ámbito supramunicipal, demanda dunha dotación de medios óptima para garantir a súa operatividade e cometido establecido no citado instrumento convencional.

A conxuntura descrita, xunto coa necesaria aplicación de criterios de eficiencia e eficacia na asignación dos recursos públicos, acreditan a existencia de razóns de interese público que xustifican a entrega do equipamento mediante este instrumento.

QUINTO.- Así, co fin de materializar a cooperación antes descrita, e tendo en conta a sintonía de obxectivos e a complementariedade dos medios e mecanismos concorrentes para a súa consecución que así o aconsellan, a AXEGA e o concello de Ponteceso (A Coruña), conveñen en subscribir o presente acordo de colaboración para a dotación de equipamento en materia de emerxencias ao GES de Ponteceso, que se rexerá polas seguintes



CLÁUSULAS

PRIMEIRA. OBXECTO

O obxecto do presente acordo é fixar as bases que rexen a colaboración entre a AXEGA e o concello de Ponteceso (A Coruña), onde ten a súa sede o GES de Ponteceso, para mellorar e reforzar a dotación de equipamento deste grupo operativo mediante a cesión en réxime de propiedade a título gratuito do seguinte material afecto en materia de emerxencias:

TIPOLOXÍA DE MATERIAL	UNIDADES
Equipo de protección individual (EPIs) para a loita contra a <i>Vespa velutina</i>	2

SEGUNDA. DESCRICIÓN DO EQUIPAMENTO OBXECTO DE CESIÓN

A dotación de cada unha das unidades dos medios materiais obxecto da cesión en propiedade está constituída polo seguinte equipamento:

- Un traxe de algodón transpirable de talla XXL e outro de talla XL.
- Con carapucha fabricada en tecido resistente e transpirable con ventilacións, con cremalleira facial para poder instalar os visores, tanto de plástico como de rexilla. Cremalleira para instalar a carapucha ao traxe. Broches para axuste de carapucha ao casco.
- Con casco ventilado.
- Con visores para carapucha



- Cun manguito téxtil, sistema de peche mediante cordón elástico e bloqueo de tanka para asegurar o peche.
- Con luva fabricada en compoñentes moi resistentes, conectable ao traxe mediante cremalleira e conectable ao manguito téxtil mediante cremalleira.

TERCEIRA. OBRIGAS DA AXEGA.

A AXEGA cooperará na realización das actuacións que perseguen acadar o obxecto á que se refire a cláusula primeira deste acordo de colaboración, mediante a entrega ao concello de Ponteceso, en réxime de cesión en propiedade a título gratuito, do equipamento específico en materia de emerxencias relacionado na cláusula primeira e que deberá ser destinado ao GES.

A adquisición previa por parte da AXEGA do material obxecto de entrega está cofinanciado polo Fondo Europeo de Desenvolvemento Rexional nun 80% no marco do Programa Operativo FEDER de Galicia 2014-2020, OT 5, Prioridade de investimento 5.2, Obxectivo Específico 5.2.1, Actuación 5.2.1.3.

CUARTA. OBRIGAS DO CONCELLO DE PONTECESO

Ao abeiro deste acordo asúmense os seguintes compromisos:

- a) Executar as actuacións que constitúen o obxecto deste acordo e cumprir todas as condicións e obrigas recollidas nel.
- b) Prestar a colaboración e facilitar canta documentación lle sexa requirida, no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Contas, así como o sometemento ás actuacións de supervisión e control previstas na demais normativa de aplicación vixente a nivel autonómica, estatal e europea.
- c) Usar correctamente e destinar o equipamento ás finalidades exclusivas derivadas das tarefas no ámbito das emerxencias e protección civil e adoptar todas as medidas precisas para garantir a súa adecuada conservación e custodia así como ao seu mantemento durante un **período mínimo de cinco (5) anos** de acordo co establecido no artigo 71 do Regulamento (UE) 1303/2013 do Parlamento Europeo e do Consello.
- d) Asumir os gastos do imposto especial sobre determinados medios de transporte, seguros, mantemento, conservación e calquera outro gasto que poida supor a cesión, así como as





indemnizacións derivadas de posibles declaracións de responsabilidade civil ou criminal polo uso do equipamento, calquera que sexa a súa contía.

e) A dar debido cumprimento da normativa vixente reguladora en materia patrimonial en relación coas implicacións no seu inventario e correspondente rexistro de bens derivadas da subscripción deste acordo, de conformidade co preceptuado no artigo 17 do Real decreto 1372/1986, de 13 de xuño, polo que se aproba o Regulamento de Bens das Entidades Locais e o artigo 278 da Lei 5/1997, de 22 de xullo, de Administración Local de Galicia.

f) Cumprir cos requisitos de publicidade nos termos sinalados na cláusula décimo primeira

QUINTA. FACULTADES DE INSPECCIÓN

A AXEGA resérvase a facultade de realizar as inspeccións e comprobacións que considere necesarias co fin de asegurar o cumprimento das obrigas e requisitos que comporta esta entrega.

A entidade beneficiaria comprométese a facilitar as actuacións de comprobación e verificación que, en relación co material obxecto do presente acordo, realice a AXEGA ben directamente ou a través de terceiros.

SEXTA. REVERSIÓN DOS BENS NA AXEGA

No caso de que se advirta que o equipamento cedido non se aplica ao fin sinalado ou deixa de estalo con posterioridade, se descoide ou empregue con grave quebrantamento ou se observe calquera incumprimento das condicións a asumir por parte da entidade beneficiaria neste instrumento, considerarase resolta a cesión e os bens reverterán á Comunidade Autónoma de Galicia, que terá dereito a percibir, logo da taxación pericial, o valor dos detrimentos ou da deterioración que experimentasen.

SÉTIMA. SEGUIMENTO DO ACORDO

Para facilitar o seguimento, cumprimento e a coordinación do acordo, constituirase unha comisión mixta de seguimento, integrada por unha persoa representante da AXEGA, e outra persoa representante do concello no que radica a sede do GES de Ponteceso.

Actuará como presidente o representante da AXEGA, con voto de calidade.

Esta comisión reunirse as veces que as partes estimen oportunas para o cumprimento do acordo.

A comisión poderá ditar as súas propias normas de funcionamento e as súas funcións serán:





- a) Interpretación do acordo.
- b) Proposta, de ser o caso, de addendas.
- c) Resolver cantas dúbidas se lle presenten polos membros integrantes.
- d) Calquera outras relacionadas co desenvolvemento deste acordo.

OITAVA. CAUSAS DE RESOLUCIÓN

O presente acordo extínguese polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) Incumprimento total ou parcial, por calquera das partes, dalgũa das estipulacións que o regulan.
- b) Mutuo acordo das partes asinantes.
- c) Decisión xudicial declaratoria da nulidade do acordo.
- d) Calquera outra causa prevista nas leis.

NOVENA. VIXENCIA DO ACORDO

O acordo de colaboración entra en vigor desde a data da súa sinatura e seguirá producindo efectos en tanto se manteñan as obrigas establecidas para cada unha das partes recollidas neste instrumento.

DÉCIMA. NATUREZA DO ACORDO

O presente acordo ten natureza administrativa e as discrepancias que puideran xurdir pola súa aplicación e, que non foran resoltas pola comisión de seguimento, serán dirimidas ante a xurisdición contencioso-administrativa.

DÉCIMO PRIMEIRA. MEDIDAS DE INFORMACIÓN E COMUNICACIÓN

En todas as actividades e resultados vinculados á execución deste acordo as partes subscritoras deberán dar debido cumprimento da normativa referente á información e publicidade comunitaria establecidas no apartado 2.2 do anexo XII do Regulamento (UE) 1303/2013 do Parlamento Europeo e do Consello, do 17 de decembro, polo que se establecen disposicións comúns relativas ao Fondo Europeo de Desenvolvemento Rexional, ao Fondo Social Europeo, ao Fondo de Cohesión, ao Fondo Europeo Agrícola de Desenvolvemento Rural e ao Fondo Europeo Marítimo e da Pesca, e se derroga o Regulamento (CE) nº 1083/2006 do Consello; e no Regulamento (UE) 821/2014 da Comisión, do 28 de xullo, polo que se





establecen disposicións de aplicación do Regulamento (UE) nº 1303/2013 do Parlamento Europeo e do Consello, no que se refire ás modalidades concretas de transferencia e xestión das contribucións do programa, á presentación de información sobre os instrumentos financeiros, ás características técnicas das medidas de información e comunicación das operacións, ao sistema para o rexistro e ao almacenamento de datos e mantemento da rotulación do equipamento cedido.

DÉCIMO SEGUNDA. PROTECCIÓN DE DATOS DE CARÁCTER PERSOAL

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), así como a Lei Orgánica 3/2018, do 5 de decembro, de Protección de Datos Persoais e garantía dos dereitos dixitais, e demais normativa vixente de aplicación en cada momento en materia de protección de datos.

DÉCIMO TERCEIRA. PUBLICIDADE

As partes asinantes consenten expresamente a inclusión e a publicidade dos seus datos persoais e demais especificacións recollidas neste acordo, no Portal de transparencia e Goberno aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno (DOG nº 30, do 15 de febreiro), no Decreto 126/2006, do 20 de xullo, polo que se regula o Rexistro de Convenios da Xunta de Galicia (DOG nº 149, do 3 de agosto).

DÉCIMO CUARTA. RELACIÓN LABORAL

A subscrición deste acordo non leva consigo relación laboral, contractual ou de calquera outro tipo entre as partes asinantes de maneira que non se lle poderá esixir ningunha responsabilidade á AXEGA, nin directa nin subsidiaria, polos actos ou feitos acaecidos no desenvolvemento deste.

DÉCIMO QUINTA. MODIFICACIÓN DO ACORDO

Calquera modificación no contido deste acordo, requirirá mutuo acordo entre a AXEGA e o concello asinante e tramitarase a través dunha addenda ao mesmo.

DÉCIMO SEXTA. RESPONSABILIDADE POR INCUMPRIMENTO DO DEREITO DA UNIÓN EUROPEA

De acordo co previsto no artigo 5.4 do Real decreto 515/2013, polo que se regulan os criterios e o procedemento para determinar e repercutir as responsabilidades por incumprimento do Dereito da Unión Europea, o réxime de obrigas e responsabilidades por incumprimentos que contén este acordo, considerase instrumento axeitado para a determinación das correspondentes responsabilidades.



DÉCIMO SÉTIMA. NORMATIVA APLICABLE

O presente acordo ten natureza administrativa e regularase polo establecido nas presentes cláusulas e na lexislación que resulte aplicable. O acordo queda excluído do ámbito de aplicación da Lei 9/2017, do 8 de novembro, de contratos do Sector Público, pola que se transpóñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, en virtude do disposto no seu artigo 4, sen prexuízo da aplicación supletoria dos principios da dita lei para resolver as dúbidas ou lagoas que se puideran presentar.

Para calquera cuestión litixiosa que se derive do mesmo, será de aplicación a Lei 29/1998, do 13 de xullo, reguladora da xurisdición contencioso-administrativa.

Ao tratarse dunha actuación con aplicación de fondos da Comunidade Europea (FEDER), observarase á regulamentación comunitaria aplicable recollida no Regulamento (UE) 821/2014 da Comisión, do 28 de xullo, así como no Regulamento (UE) 1301/2013 do Parlamento Europeo e do Consello, do 17 de decembro, sobre o Fondo Europeo de Desenvolvemento Rexional e sobre disposicións específicas relativas ao obxectivo de investimento en crecemento e emprego e polo que se derroga o Regulamento (CE) 1080/2006.

E en proba de conformidade co expresado neste acordo, asíñase polas partes comparecentes, por duplicado exemplar e para un só efecto, no lugar e data que se sinalan no encabezamento.

POLA PRESIDENCIA DA AXEGA
Por delegación de sinatura
(Resolución 20 de febreiro de 2019)
O xerente



Marcos Araujo Pereira

POLO CONCELLO DE PONTECESO
(Sede do GES de Ponteceso)

O alcalde



Xosé Lois García Carballido